



Theodora Cavegn-Degonda, Camischolas

20.04.1935 – 19.02.2001

Il carstgaun propona, mo Dieus dispona.

Quella verdad ei savens criua, enderschend che Dora hagi bandunau il terrester en la vegliadetgna da strusch 66 onns. Bia memia baul. Ina buna, luvrusa e pietusa mumma fa lartg en casa, cunzun al mariu e ses affons. Suenter liung pitir ha la

Dora sco ella vegneva numnada, rendiu sia olma al Tutpusseg en tutta tgeuadad e pasch. Lamentond ha il zenn grond annunziau quella tresta nuviala ils 19-02-2001.

La Dora era oriunda da Surrein Sumvitg. Ses geniturs ein stai Giachen Giusep Degonda e Brigita nata Venzin. El ravugl da 6 affons er'ella sco 4. affon dalla famiglia. En mudestas mo cristianeivlas relaziuns ha la trappassada gudu ina biala affonza. Mo cruschs ha ella gia sentiu cun nov onns. Siu car bab ei morts entras in accident gl'onn 1944. Ina frida nundetga en in temps da scartezia per la famiglia. Ei ha duvrau da setener ensemes e segidar cun la carezada mumma sco vieua. Sco buoba da scola ei Dora gia stada il temps da stad en pliras plassas a Surrein e Laax. Aschia saveva ella fadigar e gidar sia mumma finanzialmein. Suenter ver frequentau las scolas da vischnaunca ei Dora s'engaschada sco cameriera a Tavanasa, Sedrun e Rueras. Sia buna demanonza e curtesia vegneva schazegiada da tuts ses patruns e hospis. Gl'onn 1962 marida Dora il giuven Maurus Cavegn da Camischolas. En casa nova sper la via dalla staziun ein els ventireivels. Dieus benedescha la giuvna lètg cun 5 affons, 4 buobs ed ina buoba. Quels ein la ventira en casa, mo dattan bia lavur e quitaus. Oz ein tuts en bunas posiziuns ni han fundau atgna famiglia.

Bein ha la trapassada battiu cun curascha e differentas terapias encunter sia malingna malsogna. En ferventa oraziun e mai perdend la fidonza ha ella supportau tut ses gronds mals cun pazienzia tochen ch'il Scaffider ha priu sia fideivla survienta ellas sferas perpetnas.

Cara Dora

Per Tei ei il viadi terrester vargaus. Tut Tes cars, parents, amitgs ed enconuschents ein
trests, mo perschuadi che Ti gaudas ussa gl'engraziament e la pasch celestiala per
Tia lavur e pitir. Ruaussa enten il Segner.

Al car mariu ed affons sincera condolentscha e forza da supportar quella greva
crusch en vera cardientscha.

Pally Vinzens